

那文毅公奏議

那文毅公二任直隸總督奏議卷七十二目錄

卷七十二

糾彈庸劣

請禁私役

那文毅公二任直隸總督奏議卷七十二

男
容安恭輯

糾彈庸劣

道光六年四月十三日

奏爲口外知府人地未宜請

旨撤回另賜

簡放以重職守事竊照口外承德府一缺管轄一州五
縣旗民龐雜境圉遼闊事務亟爲繁要必須精明
練達之員方足以資整飭茲查現任知府額爾經
額係由工部司員出身於上年十月到任接事

臣

前於因公接見時察其才具未能開展恐於口外
要缺難期勝任當經札詢熱河都統臣那清安就
近察看隨時商辦毋致因循貽悞地方去後茲據
該都統覆稱該府抵任至今雖頗勉力辦事第限
於才質一切究欠裕如殊於此缺不甚相宜會商
核辦前來臣查知府為率屬大員口外係繁難要
缺該守額爾經額既不能辦理裕如自未便令其
久任繁區致滋貽悞惟並無劣跡人亦尚屬謹飭
小心應請撤回內地俟有相當缺出再行酌量奏
補至所遺承德府知府本係衝繁難兼三要缺例

應在外題調第一時實無合宜人員並請

聖主迅賜簡放以重職守謹

奏奉

硃批所奏是

道光六年四月十六日奉

上諭那彥成奏口外知府人地未宜請撤回另簡一摺
所奏是直隸承德府知府額爾經額於口外繁難要
缺辦理未能裕如著撤回仍留該省俟有內地相當
缺出酌量奏補

道光六年四月二十二日

奏爲特參疎防一夜連劫三家之文武員弁請

旨先行摘去頂戴勒限緝拏以儆玩忽事竊據隆平縣知縣林昇慶代宣晉縣詳報道光六年三月二十六日據縣屬百尺口村地方康維凝稟報村民王興耿連任玉淵等蓆片襍貨等舖於二十五日夜被賊撞門入室持火執刀嚇禁事主劫去銀衣等物而逸時宣晉縣知縣謝宇澄因公公出該縣典史移會隆平縣過境勘驗訊供估計詳報前來臣查直隸地方前因盜竊案件頗多經臣奏明選派員弁訪拏窩家以清其源並酌增竊盜治罪專條

以塞其流疊經嚴飭各地方官振刷精神講求捕務如果該縣認真整飭何致境內復有一夜連劫三家之事是此案疎防雖在該縣公出期內而究由平時緝捕廢弛實非尋常疎失可比未便照例限緝致涉宕延至該縣典史汎弁均有協捕之責不能先事嚴防亦屬怠玩現據藩臬兩司會揭請叅前來相應請

旨將現任寧晉縣知縣謝宇澄典史吳孝瑛現署寧晉汎外委張錦增現署欒城汎把總寧晉汎外委張應凱一併摘去頂戴暫行留任勒限四個月緝拏

正盜務獲究報如逾限不獲卽行撤任嚴叅一面
飛飭該管趙州移會鄰封並督同該縣一體選差
幹捕懸賞購線勒緝並另派靜海營都司劉國興
前往協同訪緝務期獲究辦理合先行恭摺叅奏
謹

奏

道光六年四月二十四日奉

上諭那彥成奏叅疎防劫案之員弁請先摘頂戴勒緝
一摺此案直隸宣晉縣百尺口村地方被賊一夜連
劫三家非尋常疎失可比該知縣平時緝捕廢弛典

史汎弁不能先事嚴防亦屬怠玩所有寧晉縣知縣謝宇澄典史吳孝瑛現署寧晉汎外委張錦增現署欒城汎把總寧晉汎外委張應凱俱著摘去頂戴暫行留任勒限四個月緝拏務獲如逾限不獲卽行撤任嚴叅毋稍寬貸

謹按道光六年五月初一日奏內

奏查大名府知府福敬一員春間

臣於差次曾蒙

皇上以該府才具頗形短淺

俯加垂詢臣因其人尙樸實率屬亦復端正辦事尙無

貽悞卽經據實奏陳乃近來隨事考核始確知其

才識實欠優長遇事亦少把握仰見

聖明洞察如神超邁

臣

下萬萬下忱曷勝欽佩晨下該

府正當查辦災務緊要之際現據該府稟擬借放貧民一月折色口糧率請動項十餘萬兩並欲援照成案截漕備用已屬不合機宜且該府甫經具稟尙未聽候核辦據稱業已先行出示曉諭周知尤屬張皇冒昧是該府於賑卹事務實乏經理之方自應另調委員籌辦始能得當現已檄飭深州直隸州知州張範東前往先行接署以便隨同該道李德立等審辦均糧案匪並查勘地方情形至

於大名府一缺臣查天津府知府周壽齡才氣開
展見識老當該員前在清苑縣任內曾經辦理賑
務一切均所熟諳以之調補可冀妥靠得力所遺
天津府一缺雖係繁劇之區第政務民情較之大
名尚易治理並有天津道鄭祖琛老成精細近在
同城一切皆可督率商辦有所秉承應請卽以福
敬調補斯缺尙可不致貽悞謹

奏

道光六年五月初四日奉

上諭直隸大名府知府福敬才具未能開展著卽撤回

留於該省遇有相當缺出酌量奏補周壽齡著調補大名府知府所遺天津府知府員缺著嚴拱補授

道光六年六月初二日

奏爲知縣才不勝任請

旨分別改降以重地方事竊照知縣一官責任親民遇有地方水旱災祲卽應隨事留心寓整飭於撫綏之中方能辦理周妥茲查廣平大名兩府屬六州縣地方當春夏之交風多雨少二麥失收大田亦未布種該州縣等各就地方情形設法籌辦尙屬認真惟元城縣知縣張金煜旣不能撫綏於平時

及至匪徒糾搶糧石財物拒傷事主又不能卽獲首犯趕緊查辦僅止隨同大名府稟報情形辦理實形竭蹶又廣平縣知縣明通於地方已被夏災並未將受旱情形詳細稟報僅止詳請平糶亦未將應如何接濟撫綏之處預爲籌備而元城縣糾搶案內卽有該縣民人更未聞曾否查拏審辦尤爲漫無主見該二縣地方正當籌辦災賑之時豈可姑容冗闕致滋貽悞業經臣分別遴員前往接署惟是該二員才識迂拘卽賑撫完竣災歉之後事務殷繁亦難期其勝任相應請

旨將張金煜降爲縣丞留直候補明通降爲筆帖式回
京歸部選用其所遺元城廣平兩缺容選合例幹
員另請

題補謹

奏

道光六年六月初五日奉

上諭那彥成奏知縣才不勝任請分別改降一摺直隸
元城縣知縣張金煜於匪徒糾搶糧石不能將首犯
趕緊拏獲辦理實形竭蹶張金煜著降爲縣丞留直
隸候補廣平縣知縣明通未將地方被旱情形詳細

稟報預爲籌備其元城縣糾搶案內有該縣民人亦
未能卽時查拏不勝知縣之任明通著降爲筆帖式
歸部銓選該部知道

道光六年十一月初七日

奏爲知縣臨差告病跡近規避據實叅奏事竊照新
疆逆回滋事奉

旨飭調吉林黑龍江官兵前往剿辦經由直隸節經臣

檄飭經由各州縣將車馬供支早爲籌備如有貽
悞推諉立卽叅辦通飭在案旋據定州知州萬鼎
洋內邛縣知縣張炳南先後告病詳請解任調理

當卽飭司委員接署並令查明該牧令兵差會否
預備卽速起辦稟報不得稍有遲悞去後茲據藩
臬兩司詳稱據署定州鄭承先稟稱該州萬鼎洋
於供應車馬等事均已辦齊無悞現當力疾在差
次照料其非有意規避尙可憑信又據署內邳縣
壽澗章稟稱張炳南於兵差供支全未籌備若非
趕緊辦理幾至遲悞似此臨當大差取巧規避之
知縣未便以病非捏飾將來仍照例起用詳請核
辦前來臣查定州知州萬鼎洋車馬等項旣已籌
備齊全實係一時患病其非有意規避似屬可信

將來病痊仍可准其照例起用至內邳縣知縣張炳南一切供應車馬未曾籌備臨差告病實屬規避相應請

旨將告病內邳縣知縣張炳南勒令休致以爲過差規避者戒並查明該員經手倉庫錢糧有無虧短另行辦理所遺員缺應歸部選直隸現有應補人員容臣遴員請補謹

奏

道光六年十一月初十日奉

上諭那彥成奏叅知縣臨差告病一摺所叅是直隸內

邛縣知縣張炳南於官兵過境全未籌備輒告病詳請開缺實屬規避張炳南著勒令休致該部知道

道光六年十一月十三日

奏爲將一年以來甄別降革各營員弁數目並請勒休年力就衰之都司彙摺具

奏事竊照畿輔營制稠密平日訓練操防全在將弁得人如果本官技藝嫻熟又肯勤於操練自可期其整飭若本官於本身技藝尙不肯練習則其操演怠惰可想而知惟駐劄省城相距各營遠近不一將弁材技之優劣訓練之勤惰非逐一調考

無由得悉是以於去冬蒞任至今春自二三月間
副將叅遊都守以及千把外委或有因公來省者
遇便考較其未經來省之弁先查其履歷年至五
十六十者俱輪流調省考驗藉以察看人材而詢
操防巡緝等事一年以來陸續輪轉考驗已有三
分之二凡弓馬嫻習人材壯健差操得力者存記
獎拔卽令回營供職亦有弓馬軟弱而年力正富
漢仗尙可堪以造就者逐一填註考冊亦卽勒限
回營練習至期再考其實係材技疎庸年力已衰
或廢弛營汛差操緝捕俱難得力者當場降革業

經隨時咨部各在案合計一年之內降革千總六員把總十一員經制外委三員通共降革千把外委十九員各營似覺較爲整肅至副將叅遊都守陸續考驗弓馬材技尙係嫻習者居多惟馬蘭鎮標曹家路都司秦良佐人本平庸業經另案奏叅又查提標順義營都司邵桂林年已衰邁弓馬亦甚平常訓練兵丁難期得力應卽請

旨勒令休致此外將弁等未考者按期考驗再示勸懲已考過者仍不時留心察看如有操防懈怠材疎技庸始勤終怠者隨時甄別臣受

恩深重諸務皆期實力整頓斷不敢稍避嫌怨委靡姑
容致滋貽悞謹

奏奉

硃批必當如此認真辦理

道光六年十一月十八日奉

上諭那彥成奏甄別員弁請將都司勒休一摺直隸提
標順義營都司邵桂林年力衰邁弓馬平常訓練難
期得力著卽勒令休致該部知道

道光六年十一月二十三日

奏爲特參規避防差之遊擊請

旨革職以肅營伍事竊照科布多換防叅將德斌告病遺缺接准部咨行令派員前往臣查有現任霸州營遊擊德凌堪以派往接辦當卽分別咨行飭遵在案旋據該遊擊稟稱蒙天津鎮派委盤查河間協屬軍器事竣回營途次墜馬跌傷左腿不能前往換防請回旗調養等情前來臣查德凌年六十二歲由鑲白旗蒙古副前鋒校補授建昌路都司陞補今職尋常操防未見出色已屬充數今於奉委接辦換防檄文之後始行稟報跌傷左腿稟請回旗顯係規避且年力已衰難期振作相應據實

參奏請

旨將霸州營遊擊德凌革職以爲規避差遣者戒並另行揀派前往接辦科布多換防事宜謹

奏

道光六年十一月二十六日奉

旨這所參規避換防稟報跌傷回旗之直隸霸州營遊擊德凌著革職所有接辦科布多換防營員著該督另行揀派前往

道光六年十一月二十九日

奏爲總核一年中記功記過之州縣分別改簡停補

以肅吏治事竊惟安民以察吏爲先凡州縣中貪
婪衰庸自應立挂彈章不敢稍存姑息其餘才具
短長原本不一而查核其勤惰優劣全在平時察
看所辦公事務須件件不予忽略隨時存記以爲
憑準臣自到任以來凡遇稟詳案件細心批閱當
下分別記功記過飭行兩司存記以示勸懲今計
臣到任已屆一年自應逐加比較除功過相抵外
功多者歸於保舉陞調案內另行核辦過多者奏
請降改停補似此小懲大戒於甄別羣材較爲真
切至州縣中極有才幹有爲之員或係一事之誤

或有從公勤奮則辦事既多內中亦有無心之過
反不若不辦事之員轉得藏拙竊祿情事各有不
同原難概論臣與藩臬兩司公同商酌內因公錯
誤事出無心者雖記過次數較多亦不應叅辦或
竟有記過次數雖少而實係無能或事出有心者
自應存記叅懲現據藩臬兩司將記過各員公同
詳請核辦內查宛平縣知縣蔡爲章精神未能振
作記過獨多而於民人趙海刃傷李五一案以原
驗刃傷例應擬徒之案旋又據呈請示息結聽斷
殊欠把握難勝京縣繁劇之任應請撤回以無字

簡缺知縣改補借補署朝陽縣事理事同知承瑞
每於招解案犯到省解役潛回追記過嚴飭仍有
解役潛回之案該丞由撫民同知借補朝陽縣現
屆邊俸期滿例應調回內地改補直隸州該丞難
勝地方繁劇之任應請仍以撫民同知補用又署
樂亭縣事卽用知縣朱性堂於控關糧書勒索之
案未能卽時審辦且有命案不能緝獲正兇疊次
記過未便因其已經卸事置之不議應請停補一
次又東光縣知縣葉秀歧於竊盜案件審辦遲延
節次記過應請撤回以簡缺知縣改補似此隨時

存記積實善辦保進省屬以爲功必錄有過
必懲共相警惕觀感於地方公事可斯逆力整頓
臣與順天府尹往返札商意見相同至熱河都統
昇寅尙未到任是以未經札商合併聲明謹

奏奉

硃批是

道光六年十二月初二日奉

上諭那彥成奏請將記過州縣分別改簡停補一摺所
辦是宛平縣知縣蔡爲章不勝京縣繁劇之任著撤
回以無字簡缺知縣改補借補署朝陽縣事理事同

知承瑞現屆邊俸期滿應調回內地改補該同知處
有招解案犯到省解役潛回之案亦難勝繁劇
以撫民同知補用署樂亭縣事卽用知縣宋性堂於
要犯未獲卽時審緝著停補一次東光縣知縣葉秀
歧審辦竊盜案件遲延著撤回以簡缺知縣改補該
部知道

道光七年四月二十九日

奏爲考驗各營員弁請將年衰技庸之都司分別勒
休並回旗當差以重營伍事竊查都司等官平日
在營有訓練操防之責有事則須在前帶兵必須

年壯技優人才勇健方稱厥職臣到任後輪流調
考上年冬間已將一年內降革員弁數目彙摺具
奏欽奉

殊批必當如此認真辦理欽此欽遵在案茲考驗得宣
化鎮龍門路都司堆器年逾六旬精力已衰弓馬
平庸訓練難期得力山永協左營都司祥安弓馬
軟弱雖履歷年開五十歲察看精神未能充足未
便因其平日差操尚無過悞稍事姑容相應請

旨將堆器勒令休致祥安回旗當差又考得馬蘭鎮左
營千總張侃天津鎮通州協左營千總劉平安大

名鎮右營把總王進城開州營署兩門汛把總事
長垣營把總李文達提標河屯協署上黃旗汛把
總事右營把總馬義安馬蘭鎮遵化營石門汛把
總劉泰來提標大水峪把總徐超英石門路黃土
嶺把總馬龍樂亭營存城把總王天寵泰寧鎮紫
荆關把總梁植易州營把總蘇鴻紫荊關浮圖峪
把總謝秀麒弓馬均屬生疎惟年力精壯皆堪造
就合併請

旨將千總張侃降爲把總千總劉平安把總王進城李
文達均降爲經制外委把總馬義安劉泰來徐超

英馬龍王天寵梁植蘇鴻均降爲額外外委謝秀
麒降爲目兵務關路蔡村汛把總王浩弓馬更屬
平常應行斥革其餘弓馬未能精熟者俱勒限回
營練習至期再行調驗並將降革各員弁咨部謹
奏

道光七年五月初四日奉

上諭那彥成奏考驗各營員弁一摺直隸宣化鎮龍門
路都司堆器年力已衰著勒令休致山永協左營都
司祥安弓馬軟弱著回旗當差馬蘭鎮左營千總張
侃天津鎮通州協左營千總劉平安大名鎮右營把

總王進城開州營署兩門汎把總事長垣營把總李文達提標河屯協署上黃旗汎把總事右營把總馬義安馬蘭鎮遵化營石門汎把總劉泰來提標大水峪把總徐超英石門路黃土嶺把總馬龍樂亭營存城把總王天寵泰寧鎮紫荆關把總梁植易州營把總蘇鴻紫荆關浮圖峪把總謝秀麒弓馬均屬生疎惟年力精壯尙堪造就干總張侃著降爲把總干總劉平安把總王進城李文達俱著降爲經制外委把總馬義安劉泰來徐超英馬龍王天寵梁植蘇鴻俱著降爲額外外委謝秀麒著降爲目兵務關路蔡村

汛把總王浩弓馬更屬平常著卽行斥革該部知道
道光七年五月二十一日

奏爲守備人弱技庸恭摺參奏以肅營伍事竊臣輪
流調驗各營員弁其有技藝生疎年力衰頹者業
經隨時參奏在案本年二月間考驗提標山永協
右營守備海清阿一員人材本未出衆弓馬亦復
平常當令回營勒限三月習練嫻熟再行來省候
考茲准提臣馬騰龍知會以該守備限習之期已
滿驗得弓馬仍復生疎精神萎靡難期長進咨行
到案查該員弓馬平常本應斥革姑從寬限今復

道光七年六月十三日

奏爲道員才難治劇恭摺奏

聞事竊查直隸通永道一缺統轄京東一帶地方兼理漕運河工在在均關緊要現任道員慶綱於道光六年七月由河南糧道調補今職臣於上年七月間叩覲

天顏已蒙

聖明鑒及恐該員才短

命臣隨時留心察看今將及一年查該道人本淳正辦事亦知謹飭誠如

聖主洞鑒才具不能開展於外任不甚相宜且本年九月間恭辦

孝穆皇后奉移差使又接辦回疆凱撤東三省兵差又有本任各事務該道才具恐不能經理裕如相應據實奏明請

旨將通永道慶綱給咨送部引

見恭候

欽定所有通永道員缺係題缺容臣揀員題補謹

奏

道光七年六月十六日

上諭那彥成奏道員才難治劇一摺直隸通永道慶綱才具未能開展不宜外任著送部引見該部知道

道光七年十月十一日

奏爲特參差操不力之都司請

旨降補以懲怠玩事竊照各營都司有表率弁兵訓練操防之責必須認真教練奮勉當差方爲無忝厥職臣於各營中留心訪察查有玉田營都司興奎赤峰營都司伊謹泰平日於公事尙知勤慎近日漸有懶散習氣於差操諸欠振作此次隨扈當差經理亦未能妥協未便以該弁現無別項劣跡稍

刑部彙考卷之二十一 刑部彙考彙考彙考

事姑容相應據實奏請

旨將玉田營都司與奎赤峰營都司伊謹泰均降一級
以守備調用以爲差操不力者戒該弁等年力尙
強請留直候補以觀後效謹

奏

道光七年十月十四日奉

旨這所參差操不力之玉田營都司與奎赤峰營都司
伊謹泰俱著降一級以守備調用留於直隸候補該
部知道

道光九年七月十四日

奏爲特叅故違

功令任意行私之教官請

旨解任提省審辦事竊臣於道光六年查明直隸各衙

門掛名散役過多不特藉避差徭且甚爲閭閻之

害種種不法難以指數會專摺奏明視衙署之大

小酌定應留散役額數予以限制其餘概從裁汰

計共裁汰散役二萬三千九百餘名均令編入里

甲當差以均徭役而卹民隱並按名書榜曉示以

絕其復充之弊其酌留各役俱飭造清冊派委道

府就近查點以防弊混各在案茲查有撫寧縣教

諭王致和仍復多設門斗並不遵照奏定章程認真裁革兼恐有影射包庇情事經該管道府詳由藩臬兩司請解任查辦前來臣查教官門斗原定額數不得過二十名今該教諭竟敢不遵奏定章程額外多設實屬任意行私難保無擾民包差情事必須嚴行提訊以肅

功令應請

旨將撫寧縣教諭王致和先行解任以便提省訊明原設門斗若干應裁若干現仍私留若干各名數如查有包差擾累劣跡卽當照例嚴行懲辦謹會同

順天學政臣沈維鏞合詞恭摺且奏謹

奏

道光九年七月十七日奉

上諭那彥成奏叅故違功令之教官請解任審辦一摺
直隸撫寧縣教諭王致和額外多設門斗並不遵照
奏定章程認真裁汰難保無影射包庇情事王致和
著解任交該督提省審訊如實有劣跡卽照例嚴行
懲辦

道光十年三月十六日

奏爲審明定擬事竊照撫寧縣教諭王致和前因多

設門斗並不遵照奏定章程認真裁革經臣會同
順天學政沈維鏞奏奉

上諭將該教諭王致和解任交

臣

提省審訊等因隨即

行司將該教諭王致和解任委員接署並將人卷
提省委審去後茲據保定府知府張範東審明擬
議由司覆訊詳解前來臣親提審訊緣撫寧縣教
諭王致和係武清縣人由嘉慶辛酉科副榜考取
正白旗教習期滿以知縣用呈請就教於嘉慶二
十四年選授該縣教諭二十五年五月到任該教
諭衙門共有額設並掛名門斗一百二十餘名輪

流供役道光元年春間該教諭因學署科房坍塌無力修復在於各門斗名下歛錢修葺共歛得制錢一百一十六千一百文統交前充學書現已告退之趙步雲承修辦理嗣趙步雲修理完竣除所歛錢文儘數動用外尙不敷大錢十餘千文係該教諭自行捐墊以資辦公道光六年間臣以直隸各衙門掛名散役過多奏明分別酌留裁革並酌定教官衙門應留門斗不得過二十名該教諭奉文後卽遵照奏定章程除舊設學書一名門斗二名照舊准其充役外復酌留門斗王珍等十八名

其餘掛名門斗趙景山等一百零二名概行革除
未經榜示亦未將原給各門斗執照追繳此外另
有私設樂舞生張伸郝國輔白璽三名該教諭因
樂舞生不在奉文裁汰之內並未革除又將已裁
門斗曹清士一名改充樂舞生名目給與執照至
七年間有掛名門斗孫克生等不知已經裁革抗
不辦差經鄉地陳士魁等先後告發經縣審訊該
教諭聞知始將各門斗執照逐一追銷編入里甲
當差經臣查知該教諭並不認真裁汰門斗奏奉
諭旨將該教諭解任審辦現經提齊人證研訊據供前

情不諱查律載官吏人等非奉上司明文因公擅
自科歛所屬財物者杖六十贓重者坐贓論又坐
贓治罪各主者通算折半科罪五十兩杖七十又
奉制書有所施行而故違者杖一百各等語此案
解任撫憲縣教諭王致和在各門斗名下歛財修
理科房按坐贓科斷罪止杖七十惟於掛名門斗
趙景山等一百零二名既經奉文裁汰並不將已
革緣由當時榜示亦未追繳原給執照以致所裁
門斗孫克生等仍有抗差之案辦理已不認真且
又私設樂舞生並將已裁門斗曹清士改充樂舞

生換給執照種種錯繆實屬違例自應照違

制律擬以滿杖係現任職官應將該教諭王致和請
旨革職以爲故違

功令者戒至已退學書趙步雲承修科房係由本官
自行歛錢發交辦理訊無侵蝕情事應毋庸議郝
國輔在學投充樂舞生與已裁門斗曹清士改充
樂舞生均係官爲給照准其充應卽其出錢捐修
科房亦由該教諭派令所致應與業經裁汰之掛
名門斗陳寶等均免置議鄉地陳士魁等呈控孫
克生等抗差各案已據該縣訊結亦毋庸議現起

郝國捕等原領樂舞生同門斗陳寶等執照併飭查銷案已訊明未到人證請免提質以省拖累再查該教諭衙門現存舊設學書趙立一名額設門斗安有王鑑二名又酌留門斗王珍等十八名足敷差遣不准再有添設應需樂舞生亦應照例由縣於本籍俊秀內考選冊報充補毋許借名私設以符定制除錄供咨送刑部並咨吏部暨順天學政謹

奏奉

硃批該部議奏

道光九年十二月十四日軍機大臣字寄奉

上諭據戶部奏稱直隸多倫諾爾同知裕昆應解道光七八兩年襍稅正額盈餘銀三萬七千六百餘兩又道光四年起至八年止陸運木稅並蒙古木稅銀二千六十餘兩疊次嚴催未據解到等語該同知裕昆前經吏部以該員推陞盛京工部員外郎例限久逾尙未到部奏請開缺另選嗣據工部以該員自道光五年起至八年止欠解木稅銀二萬六千八百四十餘兩奏請飭查本日又據戶部奏該員欠解各項稅銀屢催未解顯有侵蝕情弊必應徹底根究該員久

經卸任一應經手錢糧該督自應速飭依限交清結報何以任其宕延不加叅辦著那彥成卽查明裕昆在何處羈延卽委委員解交刑部審辦

道光九年十二月二十二日

奏爲廳員虧短稅銀遵

旨解部審辦並籌議以後稽考章程以杜虧挪而重

帑項事竊照推陞員外郎多倫諾爾同知裕昆經徵

稅課交代未清赴部遲延經臣將勒追緣由奏蒙

聖鑒在案本月十四日承准軍機大臣字寄奉

上諭據戶部奏裕昆未解道光七八兩年襍稅正額盈

餘銀三萬七千六百餘兩又道光四年起至八年止
陸運木稅並蒙古木稅銀二千六十餘兩又工部奏
裕昆自道光五年起至八年止欠解木稅銀二萬六
千八百四十餘兩飭卽查明裕昆在於何處羈延卽
委委員解交刑部審辦欽此當卽欽遵行司一面飭
委候補知州熊光禧前往京都宣化多倫諾爾一
帶迎提解部適裕昆自宣化來省途次並未與熊
光禧會遇臣當面訊以短交稅銀是否設措全完
據稱裕昆在任四年因值口外牲畜瘟疫災稅銀缺
額又因潘桃口等處水道壅塞木植不能行運並

無報稅之人以致稅銀缺額前經結算交代共應
賠繳銀三萬二千餘兩已繳銀一萬兩現遵勒限
又續交廳庫銀七千兩又交道庫銀七千兩下餘
銀八千兩儘力設措尙可完繳惟旣已奉文解部
一時無暇設措祇可著人回京變產訂限清完臣
詰以戶工二部叅追銀六萬數千兩據稟交代案
內止短銀三萬二千餘兩因何銀數不符又據稟
稱前任有未清銀款係道光二年以前已故同知
毓芳虧短彼時未經叅奏議請分年攤捐還款所
有未清銀兩交冊內均有細賬可查等語查裕昆

另... 卷之二十一... 三
雖據面稟已續交銀一萬四千兩尙未據該道廳稟報且所短稅銀尙有八千餘兩自應欽遵

諭旨解部審辦除遴委理事同知英寶於本月二十四日將裕昆解交刑部投收外伏查各省地方官經徵襍稅例由藩司奏銷各省鈔關稅務亦由督撫委員監收是徵解均有考覈多倫諾爾地方經徵稅銀則係該同知徑自解部以致盈縮虧短平時無所稽考經徵之員得以騰挪展宕每至交代時年款膠轕本省又無案據可查及查明虧短銀數盈千累萬追補又難求有著殊非慎重

帑項之道嗣後應請將多倫諾爾同知經徵水旱木
稅襍稅飭令該員按季造冊報明藩司暨總督衙
門查考俟一年期滿將徵收銀兩統限一月內詳
由藩司一律請咨批勒令全數解部掣批備查仍
由司詳請覈

題報銷如此嚴定章程庶徵解均有考覆而年清年
款不致積壓虛懸卽有遲延虧缺亦可隨時查明
叅辦較之從前辦理似爲周密謹

奏

道光九年十二月二十五日奉

上諭那彥成奏廳員虧短稅銀解部審辦並籌議稽考章程一摺直隸多倫諾爾同知裕昆虧短稅銀據稟數目與戶工二部叅追銀數不符著卽解交刑部審辦此項稅銀向係該同知徑自解部以致無所稽考著照所議嗣後多倫諾爾同知經徵水旱木稅襍稅飭令該員按季造冊報明藩司暨總督衙門查考俟一年期滿將徵收銀兩統限一月內詳由藩司一律請給咨批勒令全數解部掣批備查仍由司詳請嚴題報銷俾年清年款不致積壓虛懸倘有遲延虧缺隨時查明叅辦該部知道

道光十年正月十六日

奏爲撤回輕率之知縣酌量地方情形以簡改繁遴
員請調事竊臣忝列封圻才輕任重愧無仰報

高深惟以得人安民時時講求策畫俾地方日就治安
而於屬員功過尤不可少有假借方足允服人心
而臻治理查直隸近年以來奪犯毆差之案幾致
常有如開州盜犯季丙寅聚眾奪犯殺傷兵役爲
尤甚者上年深州所屬之饒陽縣知縣劉遵海因
拏賭被連界之獻縣山秋村民人李青山劉靠山
等糾眾奪犯致將該縣劉遵海揪毆致傷經臣提

省審辦奏明請

旨將爲首之李青山劉靠山加重問擬斬絞立決業經
正法在案伏思民不畏官實是亂階此等奪犯毆
官之犯若不從嚴懲辦必致養癰成患是以加重
辦理然推原釀成此案之由究起於該縣劉遵海
之輕率地方有開場窩賭之家例應飭役查拏或
恐官役徇縱以及同賭人多非親拏不可亦當多
帶人役或會營掩捕乃該令於夜深時帶同丁役
十餘人密往查拏以致李青山等奪犯傷官犯此
重典若非劉遵海輕率妄動何致兩命遽罹法網

是劉遵海之不合卽予以叅處亦不爲過第念該員之下鄉拏賭尙屬勤於辦事若竟予叅辦將來各州縣相率效尤因循疲玩轉得有所藉口且莠民刁風亦不可長是以未會奏叅然竟令其仍任饒陽情理似亦未得其平相應奏明請

旨將劉遵海撤任該員平日辦事尙屬認真人亦少有才具此次下鄉拏賭亦與因循廢弛不同暫行撤任俟有相當缺出酌量另補亦足以示儆惟查饒陽一缺向定爲疲難二項中缺例歸部選近數十年來人民富庶俗尙強悍命盜案多甚爲難治

臣

與藩臬兩司公同商議饒陽一缺應請改爲繁疲
難兼三要缺在外調補庶揀選易於得人如蒙

俞允劉遵海現已撤任所遺饒陽縣一缺查有肥鄉縣
知縣查揆浙江舉人由議敘知縣補授今職該員
諸事諳練才力穩實在任五年民情愛戴頗著循
聲上年列入卓異案內保薦以之調補饒陽縣新
改繁缺可期治理裕如亦無違礙處分與例相符
合無仰懇

皇上天恩俯准以查揆調補饒陽縣實於地方有裨所
遺肥鄉縣缺直隸現有應補人員容臣另行遴員

請補惟選缺改爲外調有關銓政復查有順天府
屬順義縣知縣本係選缺前於乾隆年間改爲調
缺該縣政簡民淳無多公事卽遇有差務均可率
由舊章並非繁要堪以改爲衝難二項選缺以符
銓例現任知縣朱希賢在順義人缺尙屬相當毋
庸另請更調臣與兩司酌商今據會詳前來謹會
同兼管順天府府尹臣盧蔭溥府尹臣何凌漢合
詞恭摺具

奏謹

奏奉

硃批吏部議奏

道光十年三月十六日

奏爲道府循謹有餘整頓不足請

旨撤回原衙門行走遺缺懇

恩簡放以資治理事竊照爲政在於得人衡才務期適

用臣於所屬州縣隨時與司道悉心講求凡人地

不甚相宜及才具未能稱職者均先後奏請撤回

改用仰蒙

聖訓在案惟牧令固宜考察而府道有監司表率之責亦不容稍有遷就茲查有口北道福全由刑部郎

中

簡放今職該員人甚謹飭從前辦事尙能黽勉近來年逾六旬精力稍衰遇事不免遲鈍該道管轄一府十州縣並張家口多倫獨石口三廳口外地方遼濶案件繁多恐精神不到照料難周又宣化府知府喻鴻江西進士由刑部郎中

簡放今職該員心地謹飭辦理地方公事亦無貽悞惟近來性情稍有偏執於屬員未能允洽日久恐增貽悞福全喻鴻均係刑部出身熟悉例案若改用京職亦可勝任當與藩臬兩司熟商議定請奏前

大清高宗純皇帝實錄卷之二

三

來臣為地方起見不得不據實

奏請合無仰懇

天恩俯准將口北道福全宣化府知府喻鴻撤回原衙

門行走所遺口北道及宣化府員缺請

旨簡放以重職守謹

奏

道光十年三月十六日奉

上諭那彥成奏道府難資整頓請旨撤回一摺直隸口

北道福全年力就衰精神不能周到宣化府知府喻

鴻性情偏執恐致貽誤福全著以郎中用喻鴻著以

員外郎用該員等本係刑部司員俱著撤回原衙門行走

道光十年四月初四日

奏為甄別不治輿情之知縣請

旨勒休以重地方而肅吏治事竊照知縣為親民之官
責任綦重辦公既宜奮勉聽斷尤須公明庶官民
浹洽地方日就治理臣於所屬州縣隨時留心體
察凡人地不甚相宜及才具不稱職者均經奏請
分別撤任改用効參其有干六法之員亦於上年
計典分別効參在案茲查有寶坻縣知縣馬登俊山

東進士由懷柔縣調補今職道光九年九月到任
該員始尙黽勉近則漸形自滿行爲乖謬審斷亦
未平允性耽麪黷不治輿情難勝寶坻縣繁疲難
三項要缺之任未便稍事姑容恐致貽悞據藩司
顏伯燾臬司花杰會詳請

奏前來理合會同兼管順天府府尹

臣

盧蔭溥府尹

臣何夔漢合詞恭摺具

奏請

旨將寶坻縣知縣馬登俊勒令休致以肅吏治謹

奏

道光十年四月初七日奉

上諭那彥成奏甄別知縣一摺直隸寶坻縣知縣馬登俊行爲乖謬不治輿情著卽勒令休致該部知道

道光十年閏四月初七日

奏爲知州辦案遲延先行撤任委員接署恭摺奏

聞事竊據景州知州秦光辰詳報賊犯解廷秀解廷海

盧六三犯先後在押因病取保病故臣查此案於

道光七年十二月間經前州拏獲解廷秀等三犯

訊認行竊因犯供贓數不符查傳事主外出未經

審擬旋即卸事該州到任後並不嚴傳事主到案

審擬詳結延隔三載有餘以致案犯三名先後病斃又不隨時填格詳報亦未訊明看役人等有無凌虐情弊殊屬玩忽遲延經臣飭司將該州先行撤任提集犯卷來省委員審辦俟審明再行覈實叅辦所遺景州知州員缺界連東省事務紛繁未便按班輪委查有卸署遷安縣事來省之內邱縣知縣張恩溥堪以委署據藩臬兩司會詳請

一奏前來除批飭遵照外理合恭摺奏

聞謹

奏奉

硃批所辦是知道了

道光十年七月二十日

奏爲特叅審辦遲延以致拖斃賊犯多命之知州請
旨革職事竊查前據景州知州秦光晟詳報賊犯解廷
秀解廷海盧六三犯先後在押因病取保病故一
案臣因該州審辦遲延以致先後在押病斃亦未
將各犯病故驗訊緣由隨時填格詳報當經

奏明將該州秦光晟先行撤任並將人卷提省委員
審辦欽奉

硃批所辦是知道了欽此欽遵當卽行司將提到人卷

飭委保定府審辦去後茲據該府張範東督同委
員審明擬議由司覆審詳解到臣親提研鞫緣解
廷秀解廷海均籍隸景州種地度日與族人解思
慶併其子解倉兒暨原籍靜海縣向在該處求乞
之盧六及在逃之孫華互相認識道光七年十二
月間不記日期解思慶在日因小功服弟解奎堂
家道殷實素無周卹起意行竊卽邀允解廷秀解
廷海盧六孫華於初七日夜偕至事主解奎堂家
挖窟進屋竊得穀子十七口袋背回解思慶家藏
放次日將贓穀子同口袋賣錢俵分花用是月十

一日解倉兒因無服族兄解錫祚向無周卹起意
行竊卽邀允解廷秀孫華於是夜偕至解錫祚襍
貨舖門首挖窟進舖竊得錢文等物俵分花用旋
據該州捕役於是月十三日將盧六解廷秀解廷
海拏獲送州該前州黃瀚提訊供詞閃爍將該犯
等分別羈押並據各事主赴州呈報當卽分別關
緝旋據看役稟報案犯解廷秀在押患病當經黃
瀚驗明取保撥醫調治詎該犯服藥罔效於八年
正月十五日在店病故因時值該州黃瀚丁憂卽
事該前代理州彭邦喙到任驗訊解廷秀實係因

病身死並無別故嗣據差役將逸犯解思慶拏獲
送案提同盧六等訊明夥竊供情彭令未及詳報
亦卽卸事該州秦光晟到任後接准移交因解倉
兒未獲查案催緝旋據看役稟報案犯解廷海在
押患病當卽驗明取保調治卽於二月二十七日
在店病故復據報州驗訊解廷海實係因病身死
並無別故又據差役將逸犯解倉兒拏獲送案據
供所竊各贓與事主原報不符查傳事主外出未
及訊詳卽據看監禁卒稟報案犯盧六在監患病
當經驗明提禁取保詎該犯於十一月二十三日

在店病故復據報州時值秦光辰赴府會算交代
公出經代行使目申請前署阜城縣武應衡過境
驗訊盧六委係因病身死並無別故因原案尙未
審定屍親亦未到案將人卷飭交吏目俟該州公
回再行覆訊詳辦迨該州回署後因日久未據傳
到事主質訊復節次比差屢傳旋據事主解錫祚
自行投案提同現犯解倉兒質訊明確分別擬議
併案填圖錄供於十年四月十一日始行詳報前
經臣因該州於前州移交賊犯並不依限審辦迨
至人犯病故又不逐案通報

奏請將該州秦光辰先行撤任一面檄提人卷來省
飭委保定府督同委員審明由司詳解前來臣因
該州遲延不報恐解廷秀等並非行竊正犯且解
廷秀等先後在押身死恐看役人等有凌虐情弊
當問屍親並店保人等再三詰訊據稱解廷秀等
實係曾經行竊看役人等亦並無凌虐情事案無
遁飾查解倉兒糾竊解錫祚舖內錢物解思慶糾
竊解奎堂家穀子口袋等物已據事主投案質訊
明確正賊無疑該犯等均係親屬相盜所竊各案
贓物均估值銀在十兩以上按例應分別杖笞解

倉兒一犯已據該州照各居親屬相盜無服之親減一等律於竊盜贓一十兩杖七十律上減一等杖六十折責發落應免重科解思慶已於折責發落回家後病故應毋庸議解廷秀聽從解思慶解倉兒夥竊二次解廷海盧六聽從解思慶夥竊一次本干律擬均已先後在押患病取保病故應毋庸議不能禁約子弟爲匪及失察解思慶等行竊之該管牌甲均事在

赦前請免責懲未獲贓物在於現犯名下著追給領逸賊孫華飭緝獲日另結解廷秀解廷海盧六在

店身死之處既據代理州彭邦畛並該州秦光辰
暨前署阜城縣武應衡先後驗記明確委係病劇
所致並無別故看役人等訊無凌虐情弊均毋庸
議至撤任景州知州秦光辰於前州黃瀚擊獲賊
犯解廷海等移交該州接審雖解廷秀係在黃瀚
任內病故而解廷海盧六二犯該州並不依限審
辦以致解廷海盧六等二犯先後在押拖累斃命
迨斃命之後又不將驗訊情形逐案隨時詳報任
意耽延遲至三年之久經事主自行投質始據訊
明併案通詳實屬瀆職相應請

旨將撤任景州知州秦光辰革職以示懲儆至代理州
彭邦喙於相驗解廷秀屍身後因續獲賊犯解思
慶到案訊供未及詳報旋即卸事並非遲延不報
請免查議謹

奏奉

硃批刑部議奏

道光十年六月十一日

奏爲遵

旨確切查明據實覆奏事竊臣前月承准軍機大臣字

寄奉

上諭據御史寅德奏風聞候補主事蔡學川前在長蘆鹽運使任內藉辦貢爲名攤派商人銀兩嗣調任兩淮鹽運使交卸後擬卽前赴新任因與商人爭競此銀相持十餘日復退還商人銀兩爲數不少並有從旁挾制之人在運司衙門吵嚷該署門丁胥役人等不敢驅逐任聽喧鬧毫無顧忌又於各商所交解費與所領公費銀兩內亦有侵漁等語蔡學川身任運司理宜潔已奉公若如該御史所奏殊爲有玷官箴自應嚴行究辦著該督卽將前項情事是否屬實確切查明據實覆奏欽此當將嚴密訪查緣由先行附

片覆

奏在案臣查運司陳崇禮甫經到任無所用其迴護
飭令確查蔡學川任內如何藉辦

貢爲名攤派商人銀兩如何爭競退還何人喧嚷挾
制其領解銀兩有無侵漁何項扣有平餘務得實
在情形不可稍有捏飾復密飭同城之天津道李
振翥確切訪查稟覆去後茲據長蘆運司陳崇禮
稟稱道光九年恭辦

盛京大差蘆綱遵照

奏明公捐及各差費外復有例辦路貢驟貢綱緞貢

等差俱歸通綱隨引捐交按款發交綱總具領備辦均係運司彙總出納上年七月內蔡學川調任兩淮該綱總等於七月二十四日備具領狀找領路貢綱緞貢銀八千六百餘兩於二十八日付庫支領蔡學川因八月初三日卽值交卸之期恐綱總領款不清諭俟查明款項卽行給領該綱總以差次急需動用於稟見時曾經催問至十三日查無牽混卽全數發交綱總領出有原具領狀可憑先是九年五月間蔡學川查辦八年分竈課奏銷有海豐場大使何有堂應徵八年並歷年竈課未

完七分以上照例

題叅草職績據何有堂批解銀一百八十五兩按續
完銀兩覆計未完分數雖在五分以上蔡學川因
已撤叅詳題在先未准改議詎何有堂離任來津
以未完五分例止降職不致叅草欲求先爲開復
處分數稟見未允遽欲進署而求被把門差役丁
德瑞黃恩升攔阻復以承辦戶書李允中不爲稟
請開復向該書役大聲吵嚷適在綱總領去銀兩
之時至商交鹽課向有應徵餘平久經部議附入
奏銷報卹動支至每年領解正襟銀兩俱無扣平

之款惟上年

盛京大差例貢等項由通綱照向例捐辦隨引捐輸
照庫平交納查照舊章按市平給發所有平餘作
爲遣人上差往返盤費之用亦無侵漁情事詳加
訊訪上年七八月間綱總找領路貢等項蔡學川
因查款耽延曾經綱總催問亦卽全數給發並無
爭競及旁人挾制之事與海豐場大使何有堂稟
求開復稟見不允向書役吵嚷原無干涉非因蔡
學川給領遲延藉端挾制何有堂叅追竈課業已
全完開復另補指傳承辦綱總及書役人等並撤

調是日在場喧嚷之前任海豐場大使何有堂到案嚴切訊究各供大略相同係屬實在情形不敢稍有捏飾等語并據天津道李振翥密查稟覆與運司陳崇禮所稟情節相符謹

奏奉

硃批知道了

請禁私役

道光六年七月二十四日

奏爲查革掛名吏役以除弊壺而均差徭恭摺奏

聞事竊照大小衙門額設書吏差役以及教官之門斗
佐雜之弓兵均有一定名數不容額外增添致滋
弊混直隸爲

畿輔之地往來差務絡繹殷繁額設吏役不敷發派
向准頭役各招散役數名以供差遣因散役例無
官給工食免其襍派各項差徭而刁詐之徒因此
趨避謀充掛名藉免差徭是以吏役日增司道府

廳佐襍衙門尙不至過於冒濫惟州縣之吏役有多至數十名者吏役愈多狐假愈衆藉避差徭尤其小者而因之訛詐欺壓擾害鄉閭種種不法難於指數且本身之差旣免又復倚仗官勢賄串包庇直省按地行差免差之地旣多則出差之地益少地少差重苦累轉至農民若不嚴加釐剔勢必無所底止臣訪悉其弊隨與藩臬兩司熟商酌議查白役本干例禁原不難全行革除而公務紛繁又恐不敷差遣轉致陽奉陰違有名無實莫若明定章

程子以限制應請將司道府廳衙門吏役各由本
管酌定應用人數造立卯簿不准過五十名州縣
不得過八十名教官佐雜衙門門斗弓兵不得過
二十名責令本管府道各就其缺分之大小差務
之繁簡酌定應留名數各造立循環卯簿年終報
明該管道府認真查覆具報總督衙門委人查點
均不准於額定之外任意增添餘皆一概革退編
入里甲當差仍將准其入卯之役彙造花名總冊
詳明立案比照直省兵丁免差舊規每名止准免
地三十畝以杜包庇影射如此立定限制庶農民

卷之二 戶部奏疏 卷之二 戶部奏疏 卷之二 戶部奏疏
之差徭稍均而差遣亦不慮其貽悞此皆本省應辦之事原不當瀆陳

天聽惟人數較多查禁尤須實力必應奏明立案始得永久奉行謹

奏

道光六年七月二十六日奉

上諭那彥成奏請查革掛名吏役一摺所奏是向來各直省大小衙門書吏差役及門斗弓兵均有定數不容增添惟直隸差務較繁准招散役數名例無官給工食免其差徭乃近日冒濫漸多訛詐欺壓擾害鄉

閩重滋流弊自應嚴立章程以示限制著照所請嗣後司道府廳衙門吏役不准過五十名由本官酌定名數造立卯簿州縣衙門吏役不准過八十名教官佐雜衙門門斗弓兵不准過二十名由該管道府酌定名數造立循環卯簿年終報明該管道府具報總督衙門查點餘皆一概革退編入里甲當差仍將入卯之役彙造總冊立案每名止准免地三十畝以杜包庇影射該督務當飭屬隨時認真查察實力奉行毋得日久視爲具文

道光七年八月十七日

奏爲裁汰通省掛名吏役核實查點完竣事竊照直隸大小衙門掛名吏役過多包差滋擾苦累閭閻經臣議立章程予以限制酌定應留名數造立循環卯簿年終報明該管道府認真查核具報總督衙門委員查點不准額外增添餘皆革退編入里甲當差並請照直省兵丁免差舊規每名止准免地三十畝以杜影射奏奉

上諭嗣後司道府廳衙門吏役不准過五十名由本官酌定名數造立卯簿州縣衙門吏役不准過八十名教官佐雜衙門門斗弓兵不准過二十名由該管道

府酌定名數造立循環卯簿年終報明該管道府具報總督衙門查點餘皆一概革退編入里甲當差仍將入卯之役彙造總冊立案每名止准免地三十畝以杜包庇影射欽此當經行司移飭各屬一體欽遵辦理并經臣將本衙門應留應革各役名數開單飭司知照亦經藩臬兩司將應行酌留吏役名數造冊呈送查核嗣據各道府廳州縣將正佐儒學各衙門應留應革吏役並門斗弓兵名數分別造冊具結呈送誠恐各屬所造冊結尙有不實不盡又經飭委道府丞倅分往確切查點按名寫榜出

示懸掛城鄉俾衆共知曉不能已草復充及言差
滋擾茲據各委員一律查覆均與冊造名數相符
委無捏飭情事由藩臬兩司逐加覆核共計總督
司道府廳州縣並教佐各衙門草除掛名吏役二
萬三千八百二十一名詳請覆

奏前來臣查吏役之設各衙門不能不用但官用之
以任使百姓畏之如虎狼且此輩人數既多平日
更可倚仗官勢朋比爲奸無弊不滋無惡不作現
在通省草除吏役據冊報二萬三千九百餘名其
實諒應不止此數又經按名書榜曉示以絕其復

充之弊地方少一擾累之人卽於地方少受一人
之害民間多一當差之人卽爲良民均徭役之煩
所裁汰之數萬人均編入里甲當差則累民之人
從減而役民之事從輕可爲地方培植元氣不無
稍有裨益自此次查辦之後奏明立案永遠遵行
地方官倘敢私增吏役或棍豪冒充肆擾一經查
出官員加等議處吏役加等治罪期於除害務盡
以仰副我

皇上惠愛黎元之至意謹

奏奉

硃批所辦認真甚屬可嘉

道光七年八月二十日奉

上諭那彥成奏裁汰通省掛名吏役覈實查辦完竣一摺所辦認真甚屬可嘉直隸大小衙門掛名吏役過多包差滋擾苦累閭閻前經該督奏奉諭旨酌定應留名數造立循環卯簿年終報明該管道府具報總督衙門查點餘皆革退不准額外增添茲據奏嚴飭各屬將各該衙門酌留吏役名數分別造冊具結呈送查核並委道府丞倅分往確切查點按名寫榜出示懸掛城鄉俾衆知曉現據冊報通省革除吏役竟

有二萬三千九百餘名之多官官相護朋比爲奸尙復成何政體直隸如此他省諒亦不免著通諭直省各督撫一律飭查據實裁汰按照那彥成所奏章程辦理尙於查辦後地方官復敢額外私增或棍豪冒充肆擾一經查出卽將該地方官嚴叅議處吏役加等治罪此係各該督撫必當認真查辦之事要在行之以實持之以久毋得視爲具文用副朕釐剔弊端至意

那文毅公二任直隸總督奏議卷七十二